



Centar za zastupanje  
građanskih interesa

### Saopštenje za medije

Datum: 21. april 2011. godine

## **Parlamentarci ne uzimaju bolovanje**

***Prema informacijama o broju prijavljenih dana bolovanja koje dolaze iz BiH parlamenata, naši parlamentarci ne znaju šta znači zdravstveni problem.***

U Parlamentu BiH u prošlom mandatu, od 2006-te do 2010-e godine, 42 zastupnika i 15 delegata jedva da su skupili, prema podacima administrativnih službi tog Parlamenta, **100 dana bolovanja**. Istovremeno, u entitetskim parlamentima bolovanja kao da nije ni bilo. U administrativnim službama Parlamenta FBiH kažu da Parlamentarci ne prijavljuju bolovanje, već samo najave da neće doći i onda im se to evidentira kao opravdan izostanak.

Zakon o obaveznom zdravstvenom osiguranju nalaže da je obavezno prijaviti bolovanje, pogotovo ako je ono duže od **42 dana**. Logika ovog Zakona kaže da onaj ko je bolestan ne radi, a samim tim i ne privređuje, pa ne može primati punu platu. Postoji osnovica za koju se obračunava naknada za bolovanje duže od 42 dana i sa dužim bolovanjem plate parlamentaraca bi bile manje.

Direktor Centra za zastupanje građanskih interesa – Fondacije CPI Damir Mehmedbašić je ovom prilikom izjavio:

*„Svejedno, građanin je prepušten sam sebi. Naši poslanici ne donose zakone, nego samo misle o tome kako da sebi povećaju plate i paušale, a narodu nametnu nove penale i akcize. Možda bi bilo bolje kada bi zakonodavna vlast, ipak otišla na kolektivno bolovanje. Sigurno je da bi bilo jeftinije.“*

S bolovanjem ili bez njega se često dešava da zastupnika nema na sjednicama ili dođu na početak, pa potom nestanu. Odnos zastupnika kojima su građani dali povjerenje da ih zastupaju i štite njihove interese prema obavezi prijavljivanja bolovanja ne iznenađuje jer su oni očito neodgovorni prema svim vidovima svojih obaveza.

Čini se da su parlamentarci zdraviji nego ostatak populacije, dok parlamenti, a samim tim i cijela zemlja, “boluju” od nedostatka poslaničkih inicijativa i nedonošenja novih, te izmjena postojećih zakona.

Cijeli članak o ovoj temi možete pročitati na: <http://www.gdjejelova.ba/?p=248#more-248>

CPI je nevladina, neprofitna organizacija koja prikupljanjem, analizom i objavljivanjem podataka od interesa za građane, te njihovom promocijom, aktivno podržava izgradnju civilnog društva. Fondacija CPI nastoji omogućiti da javni i verificirani podaci važni za građane BiH budu lako dostupni u kontekstu i na način kojeg može razumjeti građanin koji se profesionalno ne bavi javnom administracijom i javnim finansijama.

*Za dodatne informacije se možete obratiti našem saradniku Harisu Kuriću, mob: 062 682 011, email: [haris.kuric@cpi.ba](mailto:haris.kuric@cpi.ba)*

